

## CRENEASH



Ta Thie-Tashtee Ashoonagh Theayagh Creneash jeeaghyn dooin yn aght va sleih baghey 'sy 19<sup>oo</sup> cheead-blein trooid croiteyrns ayns balley beg çheerey er thalloo ard. Ta Creneash soit fo crink y Veayl jeeragh noi'n Cholloo, foddey ersooyl veih baljyn beggey elley. Ayns y 20<sup>oo</sup> cheead-blein v'eh 'nane jeh ny buill s'jerree raad oddagh shiu feddyn shenn-chliaghtaghyn, ellynyn as schleiyn ny croiteyrn Manninagh.

Va sleih baggyrt er e ambee tra chiare ad aght-beaghee s'noa-emshyree y churlesh stiagh ayn; er y fa shen, ren possan dy scoillaryn, deiney dooie as fir ardjeean elley goaill ayns laue yn ynnyd er-lheh shoh y 'reayll chiart myr v'eh.

She Carl Marstrander, as eshyn ny olloo son çhengaghyn Keltiagh ayns Ollooscoill Oslo, ren ny chied recortyssyn jeh Gaelg loayrit. Ren eh recortys jeh'n chroiteyr Harry Kelly, oddagh Gaelg y loayrt dy flaaoil. Myr eiyrtys er e obbyr's as obbyr William Cubbon, va stiurey Thie-Tashtee Vannin ec y traa shen, hie croit Harry Kelly er cur er-ash. Tra v'eh foslit 'sy vlein 1938, haink ee dy ve yn chied ayn jeh'n Thie-Tashtee Ashoonagh Theayagh ayns Creneash. Ta troggallyn elley as y çheer mygeayrt-y-moo nish cooney lesh soilshaghey shenn aght-beaghee croiteyrn Vannin.

Ta Creneash nish ny ardvoayl son shenn schleiyn as saaseyn eirinys. Foddee keayrtee cur-my-ner traauve lesh cabbil, cur thoo er thieyn, daaghey ollan, sneeu, fee, seyirsnys, obbyr y ghaauve, cuirr as soie 'sy thalloo as aarlaghey bee.